

Me nin̄di Hibulu metamdok mede youyemguk Yodakale Mede

Pepa yoŋ adi metam kayoŋbop nin̄ adi nadisukilitihik gweheyeune kadakane tigiŋ doktiŋa yehitubulodaan̄ pepa i youyemiŋa yehitubukilitigiŋ. Pepa yendi Bepaŋ ne'walaŋ saŋiniŋ eŋ titiŋ Jesu maanen̄ tiulidokoon̄ kameune fooŋ kwanai dedin̄ tuguk uku yohautalak. Ala pepa yendok maanen̄ nemek wapmuhi lufomkulitiniŋ (3) yohautalak.

1. Jesu adi aŋelo hekibe, be Moses, be polofete heki koom hatigiŋ u yalakamedap-maan̄ lolon̄nit hatibekdok yoŋa Bepaŋ negon̄ nindapmaguk. Maŋgoŋde Jesu adi Bepaŋ ne'walaŋ mihiniŋ hinek, kunumneniŋ foguk, fooŋ metamdi kedeba-utumba tinen̄dok yoŋa malabumun̄ eŋ folofigita ginen̄ loguk.
2. Bepaŋ negon̄ mihiniŋ Jesudi Silon̄yot Foloon̄ Hinek diniŋ Talitimen̄ Wapum hatibekdok nindapmaguk.
3. Jesu adi metam nediyen̄ adi nadisukilitimiin̄ u yanagitdok adi saŋiniŋ wapum halimilak, maŋgoŋde adi yadi Silon̄yot diniŋ Talitimen̄ Wapum foloon̄ hinek hatilak.

Moses'walaŋ Yodoko Mede keleen̄ titiŋ noli tigiŋ woŋ adi nemek Jesu'walaŋkade maŋgoŋ mintawaak wendiniŋ woliniŋ hogok, ala foloon̄ e Jesu ne foloŋ mintaguk. Undun̄ doktiŋa gawaŋbop pepa i youyemgiŋ adi maan̄

nadisukiliti gineŋ fafaŋeeŋ hatibune naihiŋ dapmawaak. Adi malabumuŋ be folofigita u be u mintayembune daudiwe Jesu'walaŋkade hogok tiŋa fafaŋeeŋ yakaneŋ.

Bepaŋ adi mihiŋiŋdi nemenemek hogohogok molom titiŋdok nindapmaguk

¹ Biyagoŋ hinek kuyoŋ, Bepaŋ adi koomkwaha medeŋiŋ polofet heki yenimbune adibo mamaŋ-papaŋ heki nai fee mede talii mebimebi gineŋ hati yenaŋtalabulune

² mindaŋ nai dapmawe tulune uŋaŋiŋgoŋ hinek, mihiŋiŋ nimbune mede niniŋguk. Mihiŋiŋ ne yadi nemenemek hogohogok wondiniŋ molom hatidok nindapmaguk. Biyagoŋ kuyoŋ, adi nehigoŋ nemenemek yehitubu-mintagumuk.

³ Kaŋ Bepaŋ ne'walaŋ saŋiniŋ be hautaŋiŋ diniŋ folooŋ mihiŋiŋ foloŋ hatak, eŋ Bepaŋ ne hatilak wendok tuwolit hinek hatilak doktiŋa medeŋiŋ saŋiniŋnitdi nemenemek hogohogok ka-sop fafaŋeeŋ ulihikilitiune hatak. Tiŋa adigoŋ kadakaŋiŋ diniŋ geŋgeŋ youtewalanda-dapmaŋ loguk, waŋiŋ Mapme Wapum loloŋnit hinek adi'walaŋ kohoŋ didimeniŋneŋkade itak.

⁴ Aŋelo heki yalakaŋme-dapmaguk hatilak, tiŋa undugoŋ wougigit loloŋnit hinek kahileguk wondi aŋelo heki'walaŋ wohigigit yalakaŋmedapmaŋ tilak.

Bepaŋ mihiŋiŋ adi aŋelo heki yalakaŋmedapmaŋ loloŋnit hinek tilak

⁵ Bepaŋ adi aŋelo niŋ mede indiniŋ nemu niŋguk, "Du biyagoŋ hinek na'walaŋ mihine.

Nu kamiñ tububihila du'walañ baha tilat.”

Be añelo niñdok indiñ nemu yoguk,

“Nu adi'walañ beu tiña hatiluwaat.

Kañ adi nu'walañ mihine tiña hatiluwaak.”

⁶ Eñ niñ adi kougoñ hatigene tuwo biyeniñ kwet-foloñ kameune foguk wondok mede indiñ yoguk,

“Bepañ'walañ añelo heki adi wanakañ hogo-hogok mulelem timiña welehikdi niutum-baneeñ.”

⁷ Añelo hekidok indiñ yoñit:

“Adi añeloñiye nadiyembune sububa wele mintaiñ eñ tipilapilayeniye nadiyembune kudupmebem wele mintaiñ.”

⁸ Mihiniñdok adi indiñ yoñit.

“Bepañ, du mapme hatihatigedi fafañeniñ hali-woñ halaak, eñ titiñ didimeniñ foloñ hogok metamgeye yabudokoluwaan.

⁹ Du yadi titiñ didimeniñdok momooñ yolañ eñ hogolidok adi nadiune tuwot mu tilak. Unduñ doktiña Bepañ, da'walañ Bepañdi welemomooñ diniñ wel munduñ momooñnitdi gomgamguk, uyadi nokeye'walañ tuwolit u kalakapmedapman hinek gomgamguk.”

¹⁰ Niñ indiñ yoñit,

“Wapum, du mebiñ tububihila kwet wapum diniñ dañiniñ kameguñ. Eñ kunum tiña nemenemek kunum gineñ ikiñ adi du'walañ kohokudi.

¹¹ Adi yadi liwe tineñ, eñ da yadi fafañeniñ hatiña woñ hatiluwaan. Adi yadi dahidahi dabugoñ buba tineñ.

¹² Undinin tubune da yehililiwenekudapmaan folonamandap gitipmun yehitubu-mintawaan. Da yadi hatilan undiningon hatiluwaan en gulet naige nemu dapmawaak.”

¹³ Bepan adi anelo nin indin nemu ninguk,
 “Buna kohone didimeninnekade itune memikg-eye yehimonogofowe kayogedi yehiyalitifowaan.”

¹⁴ Anelo hogohogok adi yadi tipilapilaye kwanai titindok yapmeguk, ala meenin hatihati momoon kahileneen adi yehitubu-lodadok kwetkwet yenin kulinjit.

2

Mede Momoon nihitubu-lodadok uyadi nadihinaka titindok

¹ Undun doktina indi Mede Momoon nadigumun wondok nadinadinale gigne tina unakon nadikahile tineem, undun tina mu gweheyeen maneem.

² Judahi'wala Yodoko Mede anelo hekidi yohautagin uyadi fafaan hakuk doktina mede u lahukin be mede u wobugin adi yadi kibikon wondok tuwolit begin.

³ Undun doktina nihitutumbadok Mede Momoon lolonit i nadigweheye tineem adi wondok kibikon didimenin hinek beneem. Uyadi Wapum negon koom yobihikuk, kan magihikdi hinek nadigin adi yofafaune nadinene biyagon hinek tuguk.

⁴ Kan Bepan nebo saninin en ne'wala kudin tina kasop ulihiguk. Tina nadihebet halimilak

u takaliŋa Uŋgoniŋ Munabuli diniŋ siloŋ daneen molomolom nimguk.

Jesu adi nai muniniŋ-kabe aŋelo heki'walaŋ hebehik foloŋ hatiguk

⁵ Biyagoŋ kuyoŋ, hatihati kobuli diniŋ yokwet kougoŋ mintawaak wendok medeniŋ nadiyam, uyadi Bepaŋdi aŋelo hekiyen kadokodok mu yoguk.

⁶ Uyadi Bepaŋ'walaŋ kwanai-me niŋdi indin yohautaguk hatak,

“Me indi dediniŋoŋ hinek doktiŋa inditok nadinimulaŋ? Indi maŋgoŋ biyagoŋ doktiŋa du momooŋ hinek nibudokolaŋ?”

⁷ Du nai muniniŋ-kabe aŋelo heki'walaŋ hebehik foloŋ fofonhinit nipmeguŋ. Tiŋa ninintiŋaloŋ wotnenikgigit loloŋnit nimguŋ.

⁸ Du nemenemek hogohogok u yehitubumintaŋ yabudokodok ninindapmaguŋ.”

Adi “nemenemek hogohogok yabudokodok” youkuk, uyadi dane mu tiŋa kunilit yodapmaguk. Ingoŋ nai indidegoŋ adi folooŋ mu kayam.

⁹ Jesu adigili kayam, adi nai muniniŋ-kabe aŋelo heki'walaŋ hebehik foloŋ hatiŋa kumuŋ diniŋ folofigita nadiguk doktiŋa Bepaŋdi nintiloŋ hauta eŋ wougigit miŋguk hatilak. Adi Bepaŋdi siloŋ tobogoŋ tinimdok yobune biyagoŋ hinek kwetfoloŋ meeniŋ hogohogok inditok kumuŋguk.

Jesu adi noliŋiye nininŋdok nadibedi mu tilak

¹⁰ Nemenemek hogohogok tubumintaguk eŋ wondiniŋ molom adi yadi wapmihiniye feedi

hauta momoon ginen hatidok nadiņa tubulo-danik datnik biyenin adi folofigita naditayen fek folonjon usuwadok nindapmaguk. Bepan adi undun tubune tuwot hinek tuguk.

¹¹ Undun doktiņa welehik youtewalanda kwanai tilak nebe, be walanda tiin adi yadi behik kubugon, ale notneye yenindok nadibedi mu tilak.

¹² Biyagon hinek, medenin indin hatak.

“Nu du’walan wohoge notneye yenihautawit.
Kayonbop fee lekinjonhik ginen ganiutum-bawit.”

¹³ Tiņa nin indin,

“Nu adi folon ulodiņa hatiluwaat.”

Tiņa nin indin yoguk,

“Yon adi na en wapmihi Bepandi namunguk wanan hatiyam.”

Jesu adi indi nihitubu-lodadok sigin gitnemnit hinek mintaguk

¹⁴ Wapmihidok yoguk won adi kwetfolon metam inditok nadiņa yoguk. Ala indin nadinim. Wapmihi adi meenin hinek doktiņa adi maan undugon tuguk. Biyagon hinek kuyon, uyadi ne’walan kumunjin di kumun molom Sadan ula sanjinijin ulatifodapmaguk.

¹⁵ Tiņa indin maan nadinim, kumundok muntadi yehitehiune wondinin folok ginen hakin adi maan fiyakuyemdok nadiņa undun tuguk.

¹⁶ Uyadi anelo heki mu yehitubu-lodalak, adi yadi Abalaham’walan yalakinije indi-ku nihitubu-lodalak on.

¹⁷ Biyagon hinek, undon degon tina kwayanye indut foloonik be nadinadinik be welenik kiutnene kubugon titindok nindapmaguk, talik noli nimaan nemu hakuk. Biyagon kuyon, uyadi silon kwanai dinin talitimen wapumdi kulemanon Bepan'wala heben folon kwanai tubune metam indi'wala yomnik youtewalandakutdok mintaguk hatilak.

¹⁸ Adi ne tikamanda en folofigita mintamimbune kakiyondaan kelekufakuk doktina meenin indibo tikamanda en folofigita mintanimbune kedem nihitubu-lodalak.

3

Jesudi Moses kalakapmeen lolonit tilak

¹ Ala notneye, hidi maan Jesu nadisukilitimimbune kunumdok gigit haninjit, hidi yadi Aposel en silon kwanai dinin Talitimen Wapumnik, Jesu aditok nadinadinila hatiyaneen.

² Adi yadi kwanai molom'wala mede tilolon mohinek tuluguk. Biyagon kuyon, Mosesdi Bepan'wala yoline hatiguk wendok tuwolit hatiguk.

³ Me yot malak ne'wala woudi loune yot dinin woudi folak, undugon Jesu'wala woudi Moses'wala kalakapmelak.

⁴ Yot hogohogok adi yotmaman menit, ale nemenemek hogohogok mintaguk adi molom Bepan.

⁵ Moses adi Bepan'wala yopman hatinila mede tilolon kwanai tuguk, uyadi mede mindan mintawaak wendok gigitmede yodok tipilapilaye kwanai-me hatiguk.

⁶ Kilisto ne adi Bepañ mihinj momoon hinekdi mede tilolon foloon hinek tuguk doktiņa yot molom hatilak. Yoli adi indikuyon. Tiņa uyadi hogok mon, nemek inditok gigit yonjit wondok nadikwambundaan nadikunakunale tiņa hatinene nihitutumbadapmaune Bepañ'walaņ yoli biyagon hatiyam unduņ yodok.

Isilae metam noli welekwambuņ tiginj, indi unduņ mu tiyaneem

⁷ Unduņ doktiņa Uņgoniņ Munabulidi mede indinj yoguk u inditok mebit tilak.

“Hidi kaminj Bepañhik nu'walaņ medene nobu nadiņa kaņ

⁸ koom mamahi-papahiye kwet fileņ welekwambuņ tiņa foko eņ mede wobu tinamginj unduņ mu taneenj.

⁹ Mamahi-papahiye adi uņonj gulet 40 wendok maanenj kudi wapuhi wapuhi agaņ tibe yabuginj inģonj nadikabeleenj nalamut tiginj.

¹⁰ Kaņ nu wondoktiņa metam u yabuņa nadikadakaanj indinj yogut, ‘Adi yadi helemahelmanj welehikdi nadigiyonda tiinj. Adi yadi nu'walaņ talik sigilulum timiņa nu'walaņ Yodoko Mede nadikabele tiinj.’

¹¹ Unduņ doktiņa kisaņ hinek nadikadakayemiņa mede indinj agaņ yofafane tugut, ‘Biyagonj hinek, nu hatikule kwet haamdok yofafaneģutneņ uņonj tuwot mu usuwaneenj hinek.’ ”

¹² Ale notneye, tiyaugene hidi'walaaniņ me niņdi kadakaninģinj mu yofiyale welenj mu tubutakaleenj Bepañ hatihati molom sigilulum timimbaakneņ ala kikadoko tiņa hatiyaneenj.

13 Tiŋa hidi indin nadinŋa helemahelman kiulihi tiyaneen. Melenai kamiŋ yoŋ adi Bepaŋ'walaŋ siloŋ tobogoŋ dinin nai. Unduŋ nadiune kadakanin dinin yalaŋdi hidi'walaanin nin welekwambuŋ mu tubumintamimbaak.

Indi Isilaehi metamdi tigiŋ unduŋ mu tiyaneem

14 Indin hinek nadinim, indi Kilisto'walaŋ Mede Momooŋ molomolom moŋgo hatihati uyadi agaŋ tububihila nadisukilitigumun unakoŋ didi-meniŋgoŋ nadikwambundaan hatineem wondi folooŋ hinek tibaak.

15 Mede indin hatak,

“Hidi kamiŋ Bepaŋhik nu'walaŋ medene nobu nadinŋa kaŋ koom mamahi-papahiye kwet fiilen welekwambuŋ tiŋa foko eŋ mede wobu tinamgin unduŋ mu taneen.”

16 Nediyeŋ medeniŋ nadikabeleen sigilulum timiŋgin? Uyadi ninjadehidi moŋ, uyadi Mosesdi talitimen tiyembune Isip kwet biŋa bugin adi hogohogok kuyeŋ tigiŋ.

17 Be neditok Bepaŋdi nadikadakaune gulet 40 dapguk? Biyagoŋ kuyoŋ, uyadi kadakanin tiŋa kwet fiilen kumuŋgin aditok tuguk.

18 Tiŋa indin neditok yofafaŋguk? “Nu'walaŋ hatikule kwetneŋ mu hinehinek foneen.” Uyadi adi'walaŋ mede wobu tigiŋ hekidok yoguk.

19 Unduŋ doktiŋa indin kayam, adi yadi nadisukiliti mu tigiŋ doktiŋa hatikule kwet mu kahilegin.

4

Bepaŋ'walaŋ hatikule kwetneŋ fofon dok mede

¹ Adi'walaŋ hatikule kwet kahiledok niniŋit, gigitmede uyadi mu uyakukuk, unduŋ doktiŋa hidi'walaaniŋ niŋdi talipmeŋ filaakneŋ ala nadinadiŋila hatiyaneŋ.

² Bepaŋ'walaŋ Mede Momoon u adi yeniŋit uŋakoŋ indi maanŋ niniŋit. Inŋoŋ oŋ, adi yadi mede u nadiŋa welehik gineŋ mu nadidahina nadisukilitiŋ doktiŋa adi'walaŋkade foloonit mokit tuguk.

³ Indi adi nadisukiliti hatnimilak doktiŋa foloon kahileyam. Biyagoŋ kuyoŋ, Bepaŋdi koomkwaha kunumkwet tubumintadapmaune kwanaiŋiŋ dapmaguk. Inŋoŋ oŋ, Isilae metamdok indiŋ yoguk,

“Nu kwihita tiyemiŋa yokwambundaanŋ yogut, 'Biyagoŋ hinek, adi yadi nu'walaŋ hatikule kwetneŋ mu hinehinek foneŋ.' ”

⁴ Bepaŋ'walaŋ kwanaiŋiŋ wendok Youkudip Mede gineŋ indiŋ youkiŋ, “Bepaŋ adi nemenemek tubumintadapmaanŋ melenai 7 folon hatikule tuguk.”

⁵ Kaŋ mede wahiŋ kamun adi indiŋ yoguk, “Adi yadi nu'walaŋ hatikule kwetneŋ mu hinehinek foneŋ.”

⁶ Mede wendok adi indiŋ nadinim. Meeniŋ nolidi hatikule kwet maaneŋ foon hatikule tineŋ. Eŋ timentimeŋ uunɔdok gigit momoon yeniŋguk adi mede wobu tiŋiŋ doktiŋa hatikule kwetneŋ mu fogiŋ.

⁷ Unduŋ doktiŋa Bepaŋ adi kotigoŋ ninihamanewe nadiŋa nai gitipmuŋ niŋ yokwambundaanŋ indiŋ yoguk, “kamiŋ”. Unduŋ

yoguk wendoktiŋa Dewit'walaŋ maŋiŋ ginen mede kameune indiŋ yoguk, Hidi kamiŋ medene nobu nadiŋa kaŋ welekwambuŋ mu taneenŋ.

⁸ Josuwadi hatikule yokwet foloon tubumintayembe tuguk binek adi Bepaŋdi nai kougoŋ nimaandok mu yobe tuguk.

⁹ Unduŋ doktiŋa indiŋ nadiyaneem. Bepaŋ metamŋiye'walaŋ hatikuledok nai Sabat niŋ hatak.

¹⁰ Bepaŋdi kwanai tubudapmaanŋ hatikuleguk, undugoŋ meeniŋ niŋ adi ne'walaŋ kwanai tubudapmaanŋ Bepaŋ'walaŋ hatikule yokwet kahilewaak.

¹¹ Unduŋ doktiŋa indi'walaaniŋ nebek niŋdi gweheye tiŋa meeniŋ koom mede wobu tiŋa tigiŋ talik unakoŋ takaliwaakneŋ ala, indi adi hatikule kwet u fafaŋe tiŋa kahileneem.

Bepaŋ'walaŋ mede diniŋ mebi

¹² Bepaŋ'walaŋ mede adi kaipmuŋ hatak, eŋ kwanai fafaŋe tiŋa tilak, miknoŋ maŋiŋ fuku-fukuŋ imikimikiyenit, ala miknoŋ wendok tuwot moŋ, uyadi mikit hinek. Wendi meeniŋ fuliŋgoŋ hinek youtomuŋa fooŋ welenik eŋ munabulinik, muŋ eŋ kitili diniŋ gibibem kitomboyout tamukneŋ hinek, ungoŋ fosuwaanŋ tomboyouthik foloŋgoŋ dobulopmadilak. Unduŋ tiŋa welenik diniŋ nadisu eŋ nadisuŋa nadidakale diniŋ mebihik miŋgoŋ yobihila yodapmalak.

¹³ Unduŋ doktiŋa nemek niŋ tubuminta tiŋitdi Bepaŋ'walaŋ namanda foloŋ hebihat mu tilak, adi'walaŋ namanda foloŋ adi nemenemek hogo-hogok miŋgoŋ eŋ yawenit mokit hadapmalak.

Biyagon kuyon, adi namanda folon titinik hogohogok dinin mebi yoneem.

Jesu adi silonyot kwanai dinin Talitimen Wapum hinek hatnimilak

¹⁴ Silon kwanai dinin Talitimen Wapum hinek nin hatinimlak adi yadi kunum maanej hinek Bepan ne hatilakneŋ ungon losuwaguk hatilak adi yadi Jesu, Bepan'walaŋ mihinin hinek. Ala adi nadisukilitimiyam u miŋgilanŋon yohautayaneem.

¹⁵ Tiŋa indi'walaŋ silon kwanai dinin Talitimen Wapum adi gweheye tinene nibukabele tiŋa mu binibilak. Indi'walaŋkade tikamanda mintalak undinonŋon adi maan tikamanda mebimebi mintamiŋguk, inŋon tikamanda ginene gweheyeen kadakanin mu tuguk.

¹⁶ Undun doktiŋa indi silon tobogon molom adi'walaŋ mapme pop heben folon welenikdi nadiloda tiŋa nadibedinit mokit waneem. Kan kadakanin be malabumun ninŋi nihitubudulalune nibuŋa welekulemaninŋe silon tobogon tinimiŋa nihitubu-lodaluwaak.

5

Bepanŋi Jesu silon kwanai dinin Talitimen Wapum hatidok nindapmaguk

¹ Kwetfolonme indi'walaŋ lekinŋonnik folon Silonyot dinin talitimen wapuhi yapmegin adi hogohogok adi meenin'walaŋ yom doktiŋa Bepan dumun hemindok yapmegin.

² Silonyot dinin talitimen undinin adi ne me gweheyeen hatilak doktiŋa meenin nadidakale

hinek mu tiŋ be gweheyehi tikamanda ginen mainj adi kedem kulemanjon yenindidimeenjanagitak.

³ Ala mebi undun doktina meenin noli'walan yom doktina en ne'walan yomdok maan dumun hemindok yonit.

⁴ Kwanai kakaan undinin adi me ninji ne nadigon tina titindok tuwot mon. Silonyot dinin talitimen wapum nin adi Bepan negon kadakaleen kwanai mimbune kedem tibek. Alon adi undugon timinguk.

⁵ Kan Kilisto adi maan undugon netok nadiune lolonit tubune silon kwanai dinin Talitimen Wapum mu tuguk. Uyadi Bepandi indin yona minguk,

“Du biyagon hinek na'walan mihine.

Nu kaminj tububihila du'walan baha tilat.”

⁶ Tina mede nin indin yoguk,

“Du Melikisedekdok tuwolit

Silon kwanai dinin talitimen hatifafanewaan.”

⁷ Jesu adi kwetfolon hatiguk nai unanin Bepandi tubulodaune mu kumundok nadinja kobulabulaye wapum tina ninadiguk. Undun tina Bepandok nadiune loune gikingon timinguk doktina nadiminguk.

⁸ Adi Bepan mihinin hatiguk ingon fiit folofigita nadiguk wondi tubulodaune mede tilolon dinin mebi naditomguk.

⁹ Tina nemenemek tubudapmaan Jesu ne hatihati fafanenin dinin talik yeme tuguk. Undun tina metam mede tilolon timiin hogohogok aditok hatihati fafanenin dinin talik dilitomyemulak.

¹⁰ Biyakon kuyon, adigon hinek silon kwanai dinin Talitimen Wapum tina Melikisedekdi hatiguk wondok tuwolit hatidok Bepandi nindapmaguk.

Welenik wapmihi'walaŋ nabuŋon mu behatidok

¹¹ Wendinin medeŋin fee hatak, inŋon hidi nadilakata tiin doktina hanindidimedok nadiwene malabudalak.

¹² Hidi Bepaŋ'walaŋ Mede Momoon koomkwaha nadigin ale hidibo meenin noli yeniyehitubu-didime tubune tuwot tibek on. Kaŋ hidi yadi tobo Bepaŋ'walaŋ mede agan miŋon hatak u kotigon haniŋdok undinin tiin. Hidi yadi nanane fafaŋenin nanaŋdok tuwot mu tiin, hidi yadi nom nanaŋdok undinin hatiin.

¹³ Nom nain adi wapmihi-kabe yenindok, undihiyen mede foloon deti nadidakaleneŋ?

¹⁴ Nanane fafaŋenin adi meenin wapuhidi nanaŋdok. Kwanai tige tige welehiŋdi nadidakaleen fofoon be kadakanin dinin mebi naditomiin, aditok hogok.

6

Bepaŋ bikabuhinakaŋ wele tubutakale titiŋdok talik mu hatak

¹ Unduŋ doktina indi Kilisto'walaŋ mede fuliŋon be foloon hinek yoyaneem. Mede koom ninindidimegin u hogok adi mu hatiyoyaneem. Unduŋ hogok nobu hatitiam kaŋ won adi nai fee yot taka hogok hati-wenedahiyam, en yot foloon adi mu mataloyam. Unduŋ doktina

indi mede kumaŋkade i halifolak indihidok adi wapumgoŋ mu tomboyoula yoyaneem. Mede indih: wele tubutakale tiŋa titiŋ komihi biŋa Bepaŋ nadisukilitidok mede,

² eŋ tali mebimebi gineŋ Imeyout titiŋ, be kohohik meeniŋ kihik foloŋ boiboi, tiŋa undugoŋ me agaŋ kumuŋgiŋ hekidi kaikaan pilatneen diniŋ mede, eŋ Bepaŋ'walaŋ mede yodapmandapman nai wapum foloŋ ninindapmaune hatihati momooŋ kahileneem, be kibikoŋnikdok tuwaŋiŋ dapmandapmanŋnit mokit kahileneem.

³ Unduŋ doktiŋa indi mede indihidok feegoŋ mu tomboyoula hati-yoyaneem. Indi yadi Kilisto'walaŋ mede fuliŋgoŋ eŋ folooŋ hinek yoyaneem. Bepaŋdi unduŋ titiŋdok kedem yobune nadiŋa taneem.

⁴ Meeniŋ Mede Momooŋdi welehik tubuhautane kunum gineŋiŋ titiŋ agaŋ tiŋa kagiŋ eŋ Uŋgoŋiŋ Munabuli dut agaŋ hati-kagiŋ,

⁵ tiŋa Bepaŋ'walaŋ Mede Momooŋ eŋ hatihati fafaŋeniŋ diniŋ saŋiniŋ wendok nadigalika tigiŋ, iŋgoŋ mu kahilegiŋ,

⁶ meeniŋ undihidi Mede Momooŋ wabihi-naka tiŋa Bepaŋ'walaŋ Mihi u nehibo kotigoŋ kolonɔdabek foloŋ ukiŋ. Unduŋ tiŋa Jesu tubumeka tiŋa nemek mutitiŋ u tubune Mede Momooŋ gineŋ kotigoŋ yanagitdok talik nemu hatak.

⁷ Kwet niŋ adi gwidi helemahelamaŋ ulaŋa tubukulemaune, meeniŋ diniyeti tiŋiŋ adi'walaŋ nanaŋe eŋ yuwoi yuwoi tubumintayemilak, uyadi Bepaŋ'walaŋ wahu kahaŋ diniŋ folooŋ mintalak.

⁸ En kwet noli gineŋ kilihikit moiniŋ hogok labiiŋ, wadi agan foloonnit mokit tilak dok-tiŋa hakinit tilak, ala kougoŋ hatigene kudupdi dawaak.

Hatihati momooŋ kahiledok gigne taneen

⁹ Notneye momohi, nu mede yolat yoŋ adi hidi kadaka tineen unduŋ nadiŋa moŋ. Mede Momooŋ gineŋ kedebahinakaneen, unduŋ nadiŋa yolat.

¹⁰ Bepaŋ adi fukuŋgoŋ fukuŋgoŋ mu tilak, hidi aditogoŋ tiŋa Jesu'walaŋ metamŋiye yabuŋa yehitubu-lodaan siloŋ tiyemgiŋ eŋ indidegoŋ maan tiyemiŋ doktiŋa Bepaŋ adi dedin tiŋa hid-itok kaulewek.

¹¹ Hidi yadi indin taneen. Hidi wanakaŋ hogohogok titin kubugoŋ tiŋa fafaŋe hinek taneen, eŋ kunum dinin hatihati momooŋ tiulidokohamuŋit u kahiledok nadisukiliti eŋ nadikunakunale tiin u mu biune fowaak, undugoŋ hatune nai dap-mawaak.

¹² Tiŋa gweheye bilakene mu taneen, adi tobo meeniŋ nadisukiliti eŋ nadikulemanit hatigene nemek gigit nininjit kahilein adi'walaŋ kayoŋ talik keleneen.

Bepaŋ'walaŋ heben foloŋ uundok Jesudi Tal-itimeŋ tinimguk

¹³ Ala adi'walaaniŋ nin Abalaham adi Bepaŋdi gigitmede niŋa loloŋnit nin'walaŋ wou foloŋ yokwambundadok moŋ lohikaan ne'walaŋ wou foloŋ kameen yokwambundaguk.

¹⁴ Tiŋa indin yoguk, "Biyagoŋ kuyoŋ, nu kahan tigambe yalakigeye fee mumuyeŋ mintaneen."

¹⁵ Kaŋ Abalaham adi mede yofafaŋe wendok nadikulema tiŋa woom hatigehatige folooŋ tubu-mintaguk.

¹⁶ Meeniŋdi me loloŋnit niŋ adi'walaŋ hebeŋ foloŋ mede yofafaŋe tinene mede u ulatifofonɔdok tuwot mu tilak.

¹⁷ Unduŋ doktiŋa Bepaŋ adi meeniŋ gigit yen-imbune welelufom tineeneŋ doktiŋa welenɔdi nadikwambundaan yoguk wendiniŋ mebi tubu-mintaan gigitmede yoguk wendiniŋ sigiŋ foloŋ yofafaŋe mede tomboyokuk.

¹⁸ Bepaŋ adi yalaŋ mu yolakdi mede fafaŋehi lufom yobihila niniŋkilitidok nadiŋa yoguk, uyadi adi'walaŋ yooŋŋiŋ gineŋ mindigeikumundi nemek folooŋdok gigit niniŋguk u nadikunakunale tiŋa moŋgotdok yoŋa unduŋ tuguk.

¹⁹ Nadikunakunale woŋ adi hatihatiniŋ diniŋ tubukiliti fafaŋeniŋ* u doko mu tilak, tiŋa nadikunakunalenik wondi ninigilune Bepaŋ'walaŋ hebeŋ gineŋ Hatihati Uŋgoŋiŋ hinek gineŋ fohinakayam.

²⁰ Indiŋ hinek mintaguk, siloŋ kwanai diniŋ Talitimeŋ Wapumnik Jesudi tububihitniniŋa dapmaan maaneŋ hinek foguk. Biyagoŋ hinek kuyoŋ, adi yadi Melikisedek hatiguk aditok tuwolit siloŋ kwanai diniŋ talitimeŋ tiŋa hatifafaŋelakdi unduŋ tuguk.

7

Melikisedek adi Bepaŋ'walaŋ kwanai-me loloŋnit hinek

* **6:19:** Gilik mede gineŋ adi muwage diniŋ anga youkiŋ.

¹ Biyagon hinek kuyon, Melikisedek adi Selem yokwet dinin mapme en Bepan Wapum Lolonit adi'wala silon kwanai dinin talitimen hatiguk. Adi-kuye Abalahamdi mapme memikniye widihikadakaan yehikeleen udanelune talipmen woon kimindenja kahan timinguk.

² Undun tubune Abalahamdibo bombon daneen bop 10 boina unanin bop kubugon aditok minguk.

Wou Melikisedek wondinin mebi inde'wala mede folon "Titin Didimenin dinin Mapme", en Selemnin Mapme wondinin mebi adi "Kulema dinin Mapme".

³ Melikisedek adi minbeunit mokit. Be man papan en dadaniye dinin mebi dedin hatitalabugin wendinin kahatnin nemu nadiyam, adi'wala hatihati adi tububihitnit mokit en dapmandapmanit mokit. Adi yadi Bepan'wala mihinindok tuwolit dumun hehen-me dapmandapmanit mokit hatiguk.

Melikisedek adi Bepan'wala silon kwanai dinin talitimen doktina silon mongokuk

⁴ I kanen hanilat. Adi yadi me lolonit hinek doktina dadanik Abalaham adi bombon kedehi hogohogok daneen bop 10 boiguk ginenin bop kubugon aditok minguk.

⁵ Indin halibuguk, Lewi'wala kobuliniyedi silon kwanai titindok yenindapmagin. Kan adibo metam noli nehi'wala nohiye, Abalaham dinin yalakinnye kungon fiit nanane bombonhik bop 10 ginenin kubugon ugamali mongotdok Yodoko Medehik ginen yenindakalegin.

⁶ Ingon on, Melikisedek adi adi'walaŋ yalaki gineni mu mintagukdi Abalaham'walaaniŋ bop 10 gineniŋ bop kubugonŋ moŋgokuk. Unduŋ tiŋa me wahu kahaŋ moŋgotdok gigit ulimiŋit u kahaŋ timiŋguk.

⁷ Unduŋ doktiŋa me loloŋnit niŋdi me fofonit niŋ kahaŋ timilak u yohebi titiŋdok tuwot mu tilak.

⁸ Nai indidegon Lewi'walaŋ yalakiŋiye kumuŋ tineeŋdi bop 10 gineniŋ bop kubugonŋ daneeŋ moŋgokiŋ, eŋ nai uŋaniŋ fafaŋeniŋ hatibaak Melikisedekdi moŋgokuk.

⁹ Unduŋ doktiŋa nu indiŋ nadilat, Lewi adi bop 10 gineniŋ kubugonŋ moŋgotakdi Abalaham diniŋ yeuli hali nemek u Melikisedek miŋguk.

¹⁰ Diki indiŋ nadidok, Lewi adi dadaniŋ Abalaham'walaŋ yeuli hatune Melikisedek gut kimindegumuk.

Dumuŋ heheŋ-me koom hatigiŋ adi kwanai-hikdi mu didimeguk

¹¹ Lewi'walaŋ yalakiŋiyedi Silonyot diniŋ talitimeŋ kwanai tagiŋ wendi tubudidime kwanai tubune didimedapmawetuguk binek adi mindaŋkade silonŋ kwanai diniŋ talitimeŋ niŋ Melikisedek nabugonŋ mu mintawe tuguk, eŋ Alondok tuwolit moŋ. Silonyot diniŋ dumuŋ heheŋ kwanai doktiŋa Judahi Yodoko Mede yemiŋit.

¹² Unduŋ doktiŋa dumuŋ heheŋ kwanai komidi wabilune kobulidi mintawaak, nai uŋaniŋ Yodoko Mede maanŋ komidi dapmalune kobuli mintawaak.

13 Gigitmededi me nagitak adi yadi Lewi'walaaniḡ mu mintaguk. Adi yadi mebop noli, dumuḡ heheḡ mu tagiḡ, adi'walaaniḡ mintaguk.

14 Wapumnik adi Juda'walaḡ yalakiḡiye gi-neniḡ mintaguk, u agaḡ nadidapmayam. Ala indiḡ, me bop wondi Dumuḡ heheḡ titiḡdok Mosesdi mu yoguk.

15 Tiḡa unduḡoḡ wondiniḡ mebi niḡ indiḡ dakalehinakalak. Dumuḡ heheḡ-me niḡ Melikisedekdok tuwolit yoḡit,

16 adi yadi folooḡnit mintaguk doktiḡa Yodoko Mede kamenḡit wondok tuwot moḡ, hati-hati fafaḡeniḡ hatak uḡoḡ Dumuḡ heheḡ tiḡa hatigukdi hatilak.

17 Unduḡ doktiḡa aditok mede indiḡ yohau-taḡit,

“Dagoḡ Melikisedekdok tuwolit Siloḡ kwanai diniḡ talitimeḡ hatifafaḡeluwaḡ.”

Jesu adi yofolok kobuli diniḡ kobumuḡ

18 Unduḡ doktiḡa Yodoko Mede koom yoḡit wendi saḡiniḡnit mokit eḡ folooḡnit mokit tuguk doktiḡa kelekuliḡit.

19 Biyagoḡ hinek, Yodoko Mededi nemek mu tubudidimedapmaguk. Unduḡ doktiḡa Bepaḡdi Yodoko Mede diniḡ kwelikoḡ gineḡ nadikunakunale folooḡ hinek tubumintaniḡguk. Kaḡ wendi nihitubu-lodaune Bepaḡ tubudulayam.

20 Kaḡ kobuli mintaguk uyadi yofafaḡe medenit mokit mu mintaguk, komihi adigili yofafaḡenit mokit Siloḡyot diniḡ talitimeḡ mintaaḡ hatigiḡ.

21 Kobuli yeŋ adi yofafaŋe foloŋ siloŋ kwanai dininŋ Talitimenŋ tuguk hatilak. Adi'walaŋ youkudip mede indinŋ hatak,

“Wapumdi ne wou foloŋ mede yofafaŋe tuguk u mu wabiwaak. Dagoŋ siloŋ kwanai dininŋ talitimenŋ hatifafaŋeluwaanŋ.”

22 Biyagoŋ kuyoŋ, mebi unduŋ doktiŋa Jesu negoŋ mede yofolok kobuli dininŋ folooŋ Bepaŋ dut nihikiukuk hatilak. Wendoktiŋa yofolok kobulidi komi kalakapmenŋ tiŋa momooŋ hinek tilak.

23 Indinŋ hali buguk, komihi adi behiyedi kumulune mihihiedi adi'walaŋ kayoŋkoŋ tiŋa kwanai titalabuginŋ, unduŋ doktiŋa feedi hatiginŋ.

24 Kaŋ kobuli adi hatihati fafaŋeninŋ hatilak doktiŋa siloŋ kwanaininŋ tomboyoutnit haliwoonŋ halaak fafaŋeninŋ.

25 Unduŋ doktiŋa adi foloŋ ulodiŋa Bepaŋ'walaŋkade wiinŋ adi yadi yehiyoutela yehitutumbaŋ yehitubu-kilitilak. Jesu adi hatihati fafaŋeninŋ molom hatilak doktiŋa helemahemanŋ inditok yahehewe tiŋa Bepaŋ ninadilak.

Jesu adi siloŋ kwanai dininŋ Talitimenŋ Wapum folooŋ hinek

26 Biyagoŋ kuyoŋ, adi yadi siloŋ kwanai dininŋ Talitimenŋ Wapumnik uŋgoŋ hinek, yomnit mokit, walininŋ, kadakaninŋ titinŋdi hatiinŋ unduŋ mu hatiŋa dokoninŋgoŋ eŋ didimeninŋgoŋ hatigene kunumnehi yalakapmedapmaanŋ loguk hatilak. Undininŋ kuyeŋ hatinimbune tuwot hinek tilak.

27 Adi yadi siloŋ kwanai dininŋ talitimenŋ komihi undininŋ moŋ, adi yomnit mokitdi maŋgande

helemaheleman timen netok yomdok dumun heen mindan meeniḡdok hewek? Biyagon kuyon, adi ne'walaḡ welen eḡ foloonḡdi nai kubugon silon tubune dapmaguk.

²⁸ Yodoko Mede nai ginen adi meeniḡ nadinadihik gweheyehidi Silonyot diniḡ talitimen wapuhi hatidok yonit. Kaḡ mindan adi Yodoko Mede siginen mede yokwambunda fafaḡeniḡdi Bepaḡ Mihiniḡ nindapmaguk. Biyagon hinek kuyon, adi kubugonḡdi walanin hatinaḡ woon hatibaak fafaḡeniḡ.

8

Jesu adi Silon kwanai diniḡ talitimen wapum kunum ginen hatilak

¹ Mede yotafomun wondiniḡ foloon hinek adi indin. Silon kwanai diniḡ Talitimen Wapumnik adi yadi wahin kunum folon Bepaḡ lolonit adi'walaḡ mapme pop tehindilendileḡnit itaknen loon fukuniḡ kohon didimeninḡnekade itak.

² Adi yadi Silonyot Unḡoniḡ, Silonyot Foloon hinek ginen unḡon Silon kwanai talitimen foloon hinek hatilak. Silonyot uyadi meeniḡdi mu maḡit, uyadi Wapum negon tubumintaguk.

³ Judahi'walaḡ Silonyot diniḡ talitimen wapuhi hogohogok adi yadi kale nanaḡ boinaḡ heheḡdok yeniḡit. Undun doktiḡa Silon kwanai diniḡ talitimen foloon hinek adi dedin tiḡa dumun hehen mu tiḡa hatibek.

⁴ Tiḡa undugon adi kwetfolon hatiluwek adigili Silonyot diniḡ talitimen mu tiluwek. Kwetfolon

adi Yodoko Mededi yolak wondok tuwolit Judahi'walaŋ Silonyot diniŋ talitimenŋ tuwot hatiŋ.

⁵ Adi yadi Silonyot welewele eŋ woliniŋ gineŋ kwanai tiŋ. Eŋ folooŋ hinek adi kunum gineŋ itak. Moses adi seli yot mawene tulune Wapumdi indinŋ ninguk, “Nadilaŋbe? Kweboboe foloŋ weleweleniŋ ganindidimeeŋ ganindapmagut wondok tuwot nemenemek hogo-hogok tubudapmawaanŋ.”

Yofolok kobuli diniŋ mede

⁶ Kaŋ nai indidegoŋ yofolok gitipmuŋ adi gigitmede lolooŋnitdi daŋiniŋ hakilitimimbune wondok foloŋ Jesudi kwanai tilak. Unduŋ doktiŋa yofolok eŋ kwanai tilak wendi dumuŋ heheŋ komi diniŋ tuwolit yalakapmedapmalak.

⁷ Yofolok timenŋ hakuk wondi folooŋnit tibe tuguk binek adi mindaŋkade nimbo mintadok medeŋiŋ mu mintaluwek.

⁸ Bepaŋ adi meeniŋdok nadiune tuwot mu tubune indinŋ yoguk,

“Hatigene nai niŋde Isilae kayoŋbop eŋ Juda kayoŋbop adut yofolok gitipmuŋ niŋ tubumintawaat. Wapumdi unduŋ yolak.

⁹ Koomkwaha mamahi-papahiye Isip kwetneŋniŋ yanagilene kohohik foloŋ yohoneeŋ adut yofolok tugut, yofolok undiniŋ moŋ. Adi yadi yofolok wendiniŋ maaneŋ kulemaŋgoŋ mu hatigiŋ doktiŋa nu sigilulum tiyemgut. Wapum adi unduŋ yolak.

¹⁰ Eŋ mindaŋ nai niŋ gineŋ Isilae kayoŋbop dut yofolok tibaat adi indinŋ. Nu'walaŋ yodoko mede

welehik maanenɗ dahiwe fowaak, tiŋa nadinadihik ginenɗ youlene halaak. Kaŋ na Bepaŋhik hatibaat, eŋ adi metamneye hatineenɗ.

¹¹ Kaŋ me niŋdi kwayaŋ be meeniŋ noliŋiye Bepaŋ'walaŋ Mede Momoonɗ yenimbene indiŋ mu yobaak. 'Hidi Wapum'walaŋ mebi nadinenɗ!' Mokoŋ, adi yadi fofonitbe, be lolonitdi wanakaŋ mebine nadidapmaneenɗ.

¹² Kaŋ nu yomhik biyembaat eŋ titiŋhik kadakaninɗ giminɗgiminɗ u tumolokuyembaat."

¹³ Kaŋ Wapum adi Yofolok Kobulidok mede yoŋila koom hakuk wondok "bumuŋ" yoguk. Biyagoŋ hinek kuyoŋ, nemenemek bumuhi eŋ gapmahak tiinɗ u dapmahinaka tibaak.

9

Koom Wapum niutumbadok tali adi woliniŋ hogok hakuk

¹ Yofolok komi ginenɗ Wapum niutumba titiŋdok tali hakuk eŋ wondiniŋ Yoholaŋ* Uŋgoniŋ kwetfoloŋ ikuk.

² Bepaŋ niutumbadok Yoholaŋ indiŋku maginɗ oŋ. Yotmaanɗ niŋ timenɗ hinek, u wou Yotmaanɗ Uŋgoniŋ yoginɗ, uŋoŋ kendol boiŋa galidok kayoŋ yakuk, tiŋa falik niŋ yakuk wondok foloŋ belet Bepaŋdok boiŋa uŋgoniŋ yoŋit wondi hakuk.

³ Kaŋ yotmaanɗ niŋ hauleɗi dobuhep tubune hatuguk uyadi wou Yotmaanɗ Uŋgoniŋ Hinehinek yoŋit.

* **9:1:** Seliyot indi'walaŋ mede ginenɗ yoholaŋ yoyam.

4 Uņon adi hemundumundune titindok alta goldi tinjit uņon ikuk. Tiņa yofolok dinin bogit goldi hafiyegumotagin wondi ikuk. Tiņa mana kabot† en Alon'walaņ tot kaikaan mundinin kadoguk uye yofolok komi dinin kawade gumoi dut wanaņ kamenjit.

5 Sigin folon adi hauta dinin Kelobim‡ welewele lufomuk papalihikdi bogit namokopņin kufula hehewe tiņa yakumuk. Ala wondinin medeņin dedin tiņa yodapmaweņ.

6 Nemenemek unduņ boiune halune yotmaan nin timen hinek uņon dumuņ heheņ-me heki adi helemehelemaņ foņat labuņat tiņa kwanaihik tiyagin.

7 En yotmaan nin maanen hinek uņon adi Silonyot dinin Talitimen Wapumhik ne kubugon gulet kubugon maanen nai kubugon foluguk. Ala hogok adi moņ, ne'walaņ yom en metam'walaņ yomdok nadisuņa nanġat moņgola foon silon tiņa kwatneluguk.

8 Nemek wendinin mebi Uņgonin Munabulidi indin nihititinenelak. Yoholaņ Uņgonin komidi uņon ihelune indi Bepaņ'walaņ Yot Uņgonin, foloon hinek ginen fofondok taliu u mingilaņgon hinek mu mintadakaleguk.

9 Yoholaņ timen ikuk wondinin mebi adi nai indidegon kwetfolon hatiyam wondinin welewelenin tilak. Yoholaņ Uņgonin ginen nanane boiņa dumuņ hemihemin wondi

† 9:4: Mana uyadi nanane Bepaņdi Judahi kwet fileņ yembu nayagin. Kisim Bek 16 uņon kunali nadidok. ‡ 9:5: Kelobim adi Bepaņ'walaņ aņelo bop nin'walaņ wohik.

meenij bopneen Bepan niutumba tigin adi'walañ welehiñ tutumbadok tuwot moñ.

¹⁰ Unduñ doktiña Judahi'walañ Yodoko Mede adi titiñ mebimebi tiña nanane ime en foloohik youtewalandadok mede hogokdi hakuk. Undiniñ uyadi kougoñ folooñdi mintaune kelekutdok, ala hogok welewelenij hakuk.

Kilisto adi siloñ kwanai folooñ tuguk

¹¹ Kilisto adi nemek momooñ agañ mintaguk hakiñ wendiniñ Siloñyot Talitimen Wapum mintaguk. Unduñ tiña Siloñyot folooñ hinek, meeniñ kohohikdi mu magiñ, kwetfoloñ inoñ iitdok tuwot moñ, uñoñ foguk.

¹² Meme en makau nañgatdi moñ, ne'walañ nañgatdi Siloñyot diniñ Yotmaan Uñgoniñ Hinehinek uñoñ nai kubugoñ fooñ nihituwaguk wondigoñ hahat fafañeniñ halaak.

¹³ Meme dut makau nañgat en makau kwam uyadi Judahi'walañ titiñ keleen wendi meeniñ genjenhinit foloñ gikwaibat tiyembune foloohik hogok walandaguk.

¹⁴ Judahi'walañ dumuñ heheñ-me hekidi unduñ tagiñ, ingoñ hatihati dapmadapmanñit diniñ Munabuli adi Kilisto tubulodaune ne'walañ hatihatiñ didimeniñ hinek u Bepandok siloñ timiña welenik bumbut nihiyoutewalandalak. Ale indi titiñnik hogohi doktiña kumuñdok gigit tugumun u Kilisto'walañ nañgatdi kedem nihiyoutewalandaune Bepan hatihati molom tipilapilaye timiya-neem.

Jesu'walañ nañgatdi kadakanindok tuwanij kameune sidokoguk

¹⁵ Unduŋ degoŋ tiŋa Kilisto adi yofolok kobuli diniŋ talitemeŋ tuguk, unduŋ tiŋa yofolok komi gineŋ hatiŋila yom tiŋit u tumolokutdok kumuŋguk. Unduŋ tuguk doktiŋa adi'walaŋ meŋimeŋiye adi yadi hatihati fafaŋeniŋ diniŋ kohoŋdiki moŋgotdok gigit yeniŋit u kedem moŋgotneen.

¹⁶ Kohoŋdiki diniŋ mede adi indiŋ hatak. Molom kumumbune adigili moŋgotdok.

¹⁷ Molom dawu kaipmuŋ hatilune kohoŋdikidok gigit yoŋit u hogok haletik ala kumumbune mede wondiniŋ folooŋ mintalak.

¹⁸ Biyagoŋ kuyoŋ, unduŋ doktiŋa yofolok komi adi undugoŋ naŋgatnit mokit mu hakuk.

¹⁹ Adi Mosesdi indiŋ tuguk. Yodoko Mede kiutkiut mebimebi nindidimeŋit indigoŋ tuwot metam mede yenyehitubu-didimedapmaan makau eŋ meme naŋgat ime gut miŋobuŋa kusek§ foloŋ dompa dumuniŋ giminiŋ ulobuŋa wendi naŋgat gineŋ fulaŋa tiŋalooŋ gikwaimbalune pepa bilibetnit be metam wanaŋ tinagomyemuluguk.

²⁰ Unduŋ tiŋa indiŋ yeniluguk, “Biyagoŋ kuyoŋ, Bepaŋdi yofolok mede yokwambundahamuŋak wendiniŋ naŋgat iŋakoŋ.”

²¹ Unduŋ yeniŋa Siloŋyot magiŋ eŋ siloŋ kwanai diniŋ kulufe heki u maŋ naŋgatdi yougomuluguk.

²² Diki adi indiŋ, Yodoko Mede gineŋ yoŋit doktiŋa nemenemek hogok-kabe nemu wabidok,

§ 9:19: Kusek u wou hisop. Koom Isip kwetneŋ Aŋelodi Isilaehi yabukiyondaan yalakapmeguk, nai uŋaniŋ Isilaehi hisop kusekdi dompa mihiniŋ'walaŋ naŋgat gineŋ kapmaŋ tiŋa yeme foloŋ hafiyegiŋ.

naŋgatdi wanaŋ youtewalandadok, eŋ naŋgatnit mokit adi yom tumolokutdok talik nemu hatak.

Kilisto adi inditok siloŋ nai kubugoŋ tubune dapmaguk

²³ Kunumneniŋ nemek folooŋ hinek hatak wendiniŋ weleweleniŋ uyadi naŋgatfitdi youtewalandadok yoŋit eŋ nemek folooŋ hinek ne adi siloŋ wapum hinekdi youtewalandadok tali kubugoŋ hatak.

²⁴ Unduŋ doktiŋa Kilisto yadi Bepaŋ'walaŋ Siloŋyot folooŋ hinek diniŋ woliniŋ meeniŋ kohohikdi magiŋ gineŋ uŋoŋ mu foguk. Adi yadi kunum maaneŋ loguk, tiŋa uŋgoŋ hatiŋila Bepaŋ'walaŋ hebeŋ foloŋ inditok tiŋa siloŋ kwanaiŋiŋ hati tilak.

²⁵ Tiŋa undugoŋ welen be folooŋdi inditok siloŋ kwanai folooŋbo kilikibo titiŋdok mu loguk. Dumuŋ heheŋ-me talitimenŋhik adigili biyagoŋ gulet indigoŋ tuwot foluguk. Ala uyadi ne'walaŋ naŋgat moŋ, uyadi naŋgat fili moŋgola Siloŋyot diniŋ Yotmaanŋ Uŋgoŋiŋ Hinehinek gineŋ foluguk.

²⁶ Kaŋ Kilistodibo undugoŋ titalabuliwek binek adi kwet tububihila mintagukneŋgoŋ tububihila nai fee hinek kumuŋtalabuluwek. Adi yadi unduŋ mu tiŋa nai wapum dulaune yomnik dapmandok ne'walaŋ folooŋdi nai kubugoŋ hinek siloŋ timimbune dapmaguk.

²⁷ Meeniŋdi nai kubugoŋ hogok kumuŋdok ninijiŋit, kaŋ wondok sigineŋ medenik yodapmandok yoŋit.

²⁸ Kaŋ Kilisto adi undugoŋ meeniŋ fee diniŋ yomhik hekiŋa nai kubugoŋ kumuŋgukdi

kotigon kadakanin dinin kwanai tibene mon, adi woom timinjila hatiin adi yanagitdok hogok mintadakalewaak.

10

Yodoko Mede folon silon kwanai tigin uyadi wolinin hogok

¹ Yodoko Mede folon nemek yonit uyadi foloon mindan mintawaak wondinin wolinin hogok. Foloon hinek mon doktina dumun hehen tiin heki adi Yodoko Mede takalina gulet indigon tuwot dumun hehen tiin ingon wendi meenin unon Bepan niutumbain tuwot mu yehitubudidimeen yehitubuwalandalak.

² Undun binek tuluwek adi silondok dumun hehen agan dapmawe tuguk. En unon Bepan niutumbain heki adi yomhinit mokit binek adi yomhidok nadibedi mu tanen.

³ Dumun hehen wondi gulet indigon mintaune yomhidok nadisuin.

⁴ Meme dut makau heki'walañ nangatdi yomhik deti youtekulek? U tuwot mon.

⁵ Biyagon kuyon, wondegon tina Kilisto ne kwetfolon fowene mede indin yoguk,
 “Silon kwanai en dumun hehen-mebimebi tiin wondok nadigalika mu tilan. Ingon on, foloone adigili nehitiulidokolan.

⁶ Kale kunilit hehen be kadakanindok dumun hehen tigamdok nadilakata tilan.

⁷ Kan yogut, ‘O Bepan, nu du'walañ nadisuhebet takaliwe bulat. Pepa bilibetnit ginen nutok mede youkin wondok tuwolit.’ ”

⁸ Wahin mede indin yoguk hatak, “Dumun hehen mebimebi en kale kunilit kadakanindok dumun hehen tigamdok nadigalika mu tilan en wondok adi nadilakata tilan.” Nemek uyadi Yodoko Mededi yolak wendok tuwot boina heyagin.

⁹ Tinja mede indin tomboyoula yoguk, “O Bepan, nu du’walañ nadisuhebet takaliwe bulat.” Undun yonja titin komi kelekula kobuli nin kambiyakuk.

¹⁰ Jesu Kilisto adi Bepan’walañ nadisuhebet takalina ne’walañ folooni nai kubugon hinek silon timimbune dapmaguk. Undun tubune indi wanakan welenik walandaguk.

Jesu adi inditok silon foloon tuguk

¹¹ Dumun hehen heki adi helemahelman kwanaihik tinila dumun unakon foloonbo kilikibo hehatiyagin, kan wendi yom hogohi u tuwot mu tumolokutuguk.

¹² Kilisto adigili kadakaninikdok silon en dumun hehen nai kubugon tubune dapmaune wahin loguk Bepan’walañ kohon didimeninnekade itak.

¹³ Kan unon memikniye adi gweheyeune yehyalibefoon ulon yapmedok woom hatilak.

¹⁴ En welehek tubuwalandadok tali folon hatiin aditok nai kubugon hinek ne’walañ folooni Bepandok dumun hemina yehitubu-walanda kwanai tubudapmaguk. Wondi haliwoon halaak.

¹⁵ Kan Ungonin Munabulidi wondinin mede undugon ninimbhitak. Ala timen adi mede indin hatak,

¹⁶ “Wapum adi indin yolak, ‘Mindan nai nin ginen Isilae kayonbop dut yofolok tibaat

adi indin. Nu'walaŋ yodoko mede welehek maanen dahiwe fowaak, tiŋa nadinadihik ginen youlene halaak.' ”

¹⁷ En mindaŋ kotigoŋ indin tomboyoutak,

“Nu yomhik tumolokulaat. En mede wobu tiŋa kadakanin tigin u kaule tibaat.”

¹⁸ Kadakanin liwedapmaune woŋ adi wondinin dumun heheŋ kwanai u wanaŋ dapmalak.

Bepaŋ adi welenikdi biyagoŋ hinek nadik-wambundaan niutumbadok

¹⁹ Notneye, Jesu adi naŋgatŋin di kadakaninrik youtekutninguk doktiŋa Silonyot dinin Yotmaan Ungonin Hinehinek ginen fofondok welenik loda tubune nadilodaan nadibedinit mokit foyaneem.

²⁰ Wondinin talik kobuli hatihatinit uyadi negoŋ tubudidimeninguk. Biyagoŋ kuyoŋ, adi unduŋ tiŋa ne'walaŋ folooŋdi tehep hakuk u youbulagineeŋ ungoŋ foguk.

²¹ Loon Silonyot dinin Talitimen Wapum Bepaŋ'walaŋ Yot mebineaŋ hatinimilak.

²² Unduŋ doktiŋa indi nadisukilitidi welenik tubulodaune biyagoŋ hinek nadilodaan nadibedinit mokit Bepaŋ tubudulaan niutumbaŋ hatiyaneem. En koom welenik yomdi tubugouyeguk u Kilisto naŋgatŋin di youtelune walandagumun eŋ foloonik u ime walinin di youtelune unduŋ kedem tineem.

²³ Unduŋ tiŋa mede yobune kwambundalakdi undubo yooŋ undubo yooŋ mu tilak doktiŋa nadikunakunale tiŋa yohautayam u fafaŋeŋgoŋ kame hatina yohautayaneem.

24 Tiŋa kikadoko tiŋila welesilon titiŋdok eŋ tinasilon kwanai u wanaŋ kiulihi tiŋa tiyaneem.

25 Tiŋa metam nadisukilitihinitdi bop tiyamenen, eŋ meeniŋ feedi mu buŋa hatiliweliwen tiin, hidi unduŋ mu tiyaneen. Biyagoŋ kuyoŋ, nai wapum agaŋ nihitubu-dula tilak, unduŋ nadiŋa gigne tiŋa kinintubukiliti tiŋa hatiyaneem.

Kadakanin nadikabele tiŋa mu titiŋdok

26 Indi yadi mede folooŋ hinekdi welenik tubuhautaune kadakanin nadihanindan be nadikabeleŋ tinene nediyeŋ wendiniŋ yomdok dumuŋ kotigoŋ heune dapmawaak. U moŋ, unduŋ mu hatak.

27 Uyadi kibikoŋ nemek malabumuŋ, eŋ kudupmebem wapum wondi hogok woomnimbaak. Biyagoŋ kuyoŋ, kudupmebem wondi Bepaŋ'walaŋ memikŋiye yehidadapmawaak.

28 Koom adi meeniŋ niŋdi Moses'walaŋ Yodoko Mede nadihanindaan lahulune meeniŋ lufomdi be lufomkulitniŋdi mebiŋiŋ yobihilune uŋaniŋgoŋ pilap hinek bulaninŋoŋnit mokit ulune kumuluguk.

29 Nai indidegoŋ adi meeniŋ nediyeŋ, Bepaŋ Mihiniŋ'walaŋ kwanai ulatifoŋ yalibitakaan, yofolok diniŋ nanŋat gombune welen walandaguk u nadihanindaan Munabuli silon tobogoŋ molom niŋkadakawaak, adi yadi kibikoŋ nemek malabumuŋ hinek mintamimbaak.

30 Nadiinbe? Indi yadi mede indin yoguk adi'walaŋ mebi nadiyam,

“Yom toboniņ wobuwobu uyadi nu’walaņ kwanai. Kibikoņdok yodapmaņ uyadi na tibaat.”

Tiņa niņ indin hatak, “Wapum adi meniņeniye’walaņ mede yodapmawaak.”

³¹ Biyagoņ kuyoņ, Bepaņ hatihati molom adi meeniņ niņ tubudidimedok yoņa honeune woņ adi nemek muntaņ yobu!

Nadisukilitihik mu gweheyewaak

³² Hidi yadi nemek koom tihatiyagiņ wendok nadisuyaneņ. Nai uņaniņ welehik gineņ hauta mintalune mik-kwadi gineņ fafaņeņ hatiņila folofigita kwanai wapum tigiņ.

³³ Kaņ noli hidi yadi metam dauyeņgoņ mekaņgoņ tihamuņa fidihi tubufigitagiņ. Eņ noli hidi nohiyedi folofigita undiniņ hinek nadiune yehitubu-lodaaņ wanaņ nadigiņ.

³⁴ Hidi nohiye yot fafaņeniņ gineņ foune wele-bulaņgoņ kisaņ nadigiņ. Eņ muneņ bombon holom moņgolune bombon folooņ fafaņeniņ ha-laak u agaņ hatinimilak unduņ yoņa welemo-ooņ hinek nadigiņ.

³⁵ Ale yoņ adi fafaņehik gweheye mu tubune fafaņe tiņa hatigene kougoņ tuwaņiņ lolooņit beneņ.

³⁶ Unduņ doktiņa hidi fafaņe tubumintaaņ Bepaņ’walaņ nadihebet takalidapmaaņ hatigene nemek gigit haniņit wondiniņ folooņ moņgotneņ.

³⁷ Ala nai muniniņ-kabe niņ hatak u dapmaune “Bubuņdok yoņit adi nai tiloņ tifoņ mu tiņa pilap hinek busuwawaak.

³⁸ Ingoŋ oŋ, nu'walaŋ me be tam didimeniŋ adi nadisukiliti doktiŋa hatihati kahilewaak. Eŋ nadigweheye nobu tibaak adi walanedi nadim-imbene mu utumbawaak.”

³⁹ Indi yadi nadigweheye tiŋa kadakadok moŋ, indi yadi nadisukiliti tiŋa hatihati kahiledok gigit.

11

Nadisukiliti diniŋ mede

¹ Nadisukiliti diniŋ mebi adi indiŋ hatak: Nemek niŋ nimdok gigit niniŋit u nadikwambundaan wondok nadikunakunale, eŋ nemek foloon daunikdi mu kaŋ hogok welenikdi nadikahileen behatiyam wondi nadisukiliti tilak.

² Biyagoŋ kuyoŋ, meeniŋ komihi nadisukilitihinit adi nadisukiliti undihi behatibune Bepaŋdi yabune utumbagak.

³ Kwet adi Bepaŋ'walaŋ maŋiŋ medede tiŋa mintagak uyadi nadisukilitinit hatiyam doktiŋa nadiyam. Indiŋ kuyoŋ, nemenemek miŋgoŋ yabam yoŋ adi Bepaŋdi nemek miŋgoŋ mu yabamdi tubumintagak.

Abel, Inok eŋ Nowa adi nadisukilitihinit

⁴ Abel adi nadisukilitinit hatiguk doktiŋa Bepaŋ siloŋmuni hemimbune kaune utumbagak, eŋ Kein'walaŋ adi wabi tuguk. Biyagoŋ kuyoŋ, nadisukilitiniŋ doktiŋa Bepaŋdi kaune me didimeniŋ tubune dumuŋ heguk u kahileune nadisukiliti halimiŋguk u mintadakaleguk. Abel adi nadisukilitinit hatiguk doktiŋa agaŋ kumuŋguk iŋgoŋ medeŋiŋ nadinene kaipmuŋ hatiŋa ninilak nabugoŋ tilak.

⁵ Inok adi nadisukilitinit hatiguk doktiņa kumuņ mu tuguk, Bepaņdi kunum gineņ kaipmuņ nagiloguk. Unduņ tubune meeniņdi lohi tigiņ. Tiņa mu lolune timenņoņ Bepaņdi adi kaune utumbalak u agaņ yohautani.

⁶ Indi nadisukilitinit mokit hatinene Bepaņdi nibune utumbadok talik nemu hatak. Bepaņ signikdi hogok mu niutumbadok. Nebek niņ adi Bepaņdi nagitdok nadilak adi indin nadisukilitiluwaak: Bepaņ adi biyagoņ hatiņila metam nadisukilitidok gicine tiin kahaņ tiyemiņa yehitubu-lodaņ hatihati yemulak.

⁷ Nowa adi maņ nadisukilitinit hatiguk doktiņa Bepaņdi nemek kougoņ mintawaak wondiniņ gigit timen niņguk. Nimbune adi nadimbune loune gikiņgoņ timiņa wapmihi tam kaipmuņ hatidok nadiņa muwage wapum tutumbaguk. Adi unduņ tiņila meeniņ yomhinit diniņ mebihik miņgoņ tubumintaguk. Unduņ tiņa nadisukilitinit tiņa yomnit mokit hatihati wondiniņ folooņ kahileguk.

Abalaham adi nadisukilitinit

⁸ Abalaham adi nadisukilitinit hatiguk doktiņa ne'walaņ kwet u wabiņa kwet niņ kahiledok nimbune mede tiloloņ tuguk. Tiņa kwet dendok hinek yonit u mu nadiņa hogok pilali uguk.

⁹ Nadisukilitinit doktiņa kwet gigit niņitnen uņoņ usuwaņ yokwet niņ tubukilitiņa mu hatiguk. Gitipmuņ doktiņa seli yot mauyat tiņila kwetkwet uņaņbo uņaņbo itouluguk. Aisak dut Jekop adi gigitmede uņakoņ kahilegumuk iņgoņ adi maņ undugoņ tugumuk.

¹⁰ Abalaham adi yokwet niŋ ifafaŋe tilak Bepaŋdi tubumintaanŋ mohinek tutumbaguk wendok nadiŋila hatiguk.

¹¹ Sela adi maanŋ unduŋonŋ nadisukilitinit dok-tiŋa saŋiniŋ halimimbune tam gawada tuguk iŋŋonŋ mihiwele tuguk. Adi indiŋ nadiguk. Bepaŋ adi mede biyagonŋ hogok yolak doktiŋa mede naniŋguk u foloonŋ tubumintawaak.

¹² Unduŋ degonŋ tiŋa me kubuŋonŋ, adi minta-ulihakadok saŋiniŋniŋ aganŋ dapgaguk iŋŋonŋ adi'walaaniŋ yalaki minta-ulihaka tigiŋ adi yadi kunum folonŋ hinantilamek ilawiŋ aditok tuwolit, eŋ ime luhi magineŋ kiŋ itak, meeniŋdi tuwot mu kunadapmandok wendok tuwolit mintagiŋ.

¹³ Meeniŋ unduŋ kuyeŋ nadisukilitinit hatiŋa kumuŋdapgagiŋ. Nemek gigit yeniŋit u foloonŋ mu beŋa hogok kwatnaŋonŋ halune dauhikdi kaŋ nadikunakunale tigiŋ. Unduŋ tiŋa mebihik indiŋ nadigiŋ; Indi yadi kwet foloonŋ mu kahileenŋ hogok buŋambu unduŋ hatiyam.

¹⁴ Mede unduŋ yoŋa yokwet mebi niŋ tubu-mintadok welehiŋ fagihi tuguk.

¹⁵ Unduŋ tiŋa nehi'walaŋ yohikwehiŋ biŋa bugiŋ wondok welehiŋ kolonŋonŋ mu yakuk. Unduŋ nadine tigiŋ binek udanene nadiŋa kedeŋ udanene tigiŋ.

¹⁶ Adi yadi yokwet momoonŋ kunum gineŋ hatak ukuyendok nadigalika tigiŋ. Unduŋ dok-tiŋa metam wendi Bepaŋ indiŋ niŋgiŋ. “Du indi'walaŋ Bepaŋ.” Kaŋ Bepaŋ adi medehik wendok meka mu tilak. Maŋgande adi negonŋ yokwet wapum niŋ tiulidokoyemiŋguk.

Iso en Jekop

17 Abalaham adi nadisukilitinit hatiguk doktiŋa Bepaŋdi Abalaham'walaŋ nadisukilitiŋiŋ kameka titiŋdok yoŋa Aisak siloŋ dumuŋ hemiŋdok nimbune medeŋiŋ nadiguk. Biyagoŋ kuyoŋ, adi gigitmede moŋgokukdi mihiŋiŋ kubugoŋ tubudapmandegoŋ tuguk.

18 Gigitmede indiŋ nadiguk, "Aisak'walaaniŋ yalakigeye minta ulihaka tineeŋ."

19 Uyadi indiŋ nadiŋa tuguk. Bepaŋ adi meeniŋ kumuŋ gineniŋ yehitubu-kaikadok saŋiniŋ hal-imilak. Unduŋ doktiŋa kumuŋ gineniŋ nabugoŋ tubu-udanemiŋguk.

20 Aisak adi nadisukilitinit hatiguk doktiŋa Jekop gut Iso kahaŋ tiyemiŋa nemek kougoŋ mintayembaak wondiniŋ kigili mede maan yeniŋguk.

21 Jekop adi nadisukilitinit hatiguk doktiŋa kumuŋdok tiŋila Josep mihiŋiyat kahaŋ tiyemguk. Tiŋa kuyaŋdi malidamdaŋ ilaŋa Bepaŋ mulelem timiŋa niutumbaguk.

22 Josep adi nadisukilitinit hatiguk doktiŋa kumuŋdok naiŋiŋ dulalune Isilae metam adi hatige Isip kwet wabiŋa nehi'walaŋ yohikwehineŋ uneeŋ wondok nadisuŋa kitiliŋiŋdok mede timenŋoŋ yenindakaleguk.

Moses gut Josuwa adi nadisukilitihiniŋ

23 Moses mintaune miŋbeu adi nadisukilitihiniŋ doktiŋa mihi kaditaan mapme medeŋiŋdok munta mu tiŋa muyakip lufomkulitniŋ kamehebi tubune hakuk.

24 Moses adi nadisukilitinit hatiguk doktiņa bediune Felo waabiņiņ diniņ mihi nimbune adi moņ yoluguk.

25 Adi yadi kadakaniņ diniņ tinagalika muņiņoņ u wabiņa Bepaņ'walaņ meņimeniye dut folofigita eņ bulaniņoņ nadidok yoguk.

26 Unduņ tiņa Isip kwet diniņ muneeņ bombon duhuduhu wapum wendok nadiune gelegelem tuguk. Eņ Kilisto doktiņa meka tiņa welebulaniņoņ hatidok adi nadiune folooņ tuguk. Uyadi hatigene folooņ moņgolaat nadiņa unduņ tuguk.

27 Adi nadisukilitinit hatiguk doktiņa mapme'walaņ kwihita ulatifoōņ Isip kwet bikabuņa uguk. Unduņ tiņa Bepaņ hebiņiņ u dawidi miņoņ nabuōņ kaņ adi'walaņkade wooņ galiguk.

28 Moses adi nadisukilitinit hatiguk doktiņa yobune Aņelodi Yabukiyondaņ Yalakapmegukdok dompa mihiniņ dobuņa naņgātņiņdi talik yeme foloņ hafiyegiņ. Kaņ Aņelodi u kakiyondaņ Isilaehi mihihiye tuwo heki biyabuguk.

29 Kaņ Isilae metam adi nadisukilitihinit hatigiņ doktiņa Imeņgwaņ Giminiņ gineņ kwet gineņ siliņ halu yawam nabuōņ halu wooņ dapmaņ logiņ. Kaņ Isiphidibo unduōņ tinim yo tiyaugiņ iņoņ imeņgwaņdi kwatneeņ buņa yehikufulaguk.

30 Isilae metam adi nadisukilitinit hatigiņ doktiņa Jeliko yokwet diniņ gimbaņ kelemadiune melenai 7 tubune gologuk.

31 Talitam Lehap adi nadisukilitinit hatiguk

doktiņa meyat kwet kanadi tide ugumuk menot tiyemguk. Ala metam mede wobuhinit udihikumuņģiņneņ adi kubugoņ bikabugiņ.

Meeniņ nadisukilitihinit noli

³² Tiņa mede noli deti yodapmaweņ. Gidiyon eņ Belak, eņ Samson eņ Yepta eņ Dewit eņ Samuel eņ polofet heki'walaņ mede kahat tiliwit binek kweheyeniņ tuluwek.

³³ Adi yadi nadisukilitiniņ hatigiņ doktiņa meeniņ bop fee yehitifogiņ. Unduņ tiņa tubudidime kwanai didimeneņģoņ tigiņ. Eņ nemek gigit yeniņit wondiniņ folooņ begiņ. Unduņ tiņa laion mahik teheyemgiņ,

³⁴ kudupmebem diniņ wakokom tubusububagiņ, mik-kwadi eņ tebe bohomiņa widihine tagiņ iņģoņ oņ, adi kaipmuņ hatiyagiņ, gweheyehidi kotigoņ fafaņegiņ. Mik gineņ me saņģihi tigiņ, memik kwet niņkadehi udihi yehikelegiņ.

³⁵ Eņ tamwoi noli nadisukilitigiņ doktiņa Bepaņdi yehitubu-lodaaņ yohohiye be wapmihihie kumuņ gineņiņ yehitubukaikayemguk. Meeniņ noli folofigita yemiņa kudi hogohi tiyemgiņ, unduņ tiyemiņa nadisukilitihik wabiune biyabudok yeniņģiņ, iņģoņ adi yadi hatihati fafaņeniņdok pilatne nadiņa unduņ mu tigiņ.

³⁶ Meeniņ noli adi yenimpekit tiņa kiyegelepdi yehiwidihitnadigiņ, eņ noli widihi tubufigita tigiņ, eņ noli kayohik kohohik yehi-ibikilitiņa yot fafaņeniņ gineņ yapmegiņ.

³⁷ En noli adi kawadedi widihikumunḡiḡ. Noli segedi yehidobulopmadigiḡ. Noli miknoḡdi kodi-hik dobulopmadigiḡ. En noli adi unduḡ tiyem-bune dompa en meme sigiḡ gitnemdi tinahukut tiḡa map hatiḡila bulaniḡoḡ kisaḡ nadigiḡ.

³⁸ Unduḡ doktiḡa adi pupuheneḡ, kwetkwet en meeniḡ mu hatiḡneḡ en kweboboeneḡ, en kawade mage giḡeḡ, en kwet giḡaneḡ, momooḡ wooḡ hebihatiḡiḡ. Adi'walaḡ titiḡhik u uḡoḡoḡiḡ hinek doktiḡa metam noli nadisukilitihiniḡ mokit hatiḡiḡ aditok tuwolit mu tuguk.

³⁹ Adi hogohogok nadisukilitihik doktiḡa Bepaḡdi yabune utumbaguk, iḡoḡoḡ oḡ, nemek gigit yeniḡit wondiḡiḡ folooḡ mu tubumintagiḡ.

⁴⁰ Mebi indiḡ doktiḡa. Bepaḡ adi indi'walaḡkade nemek wapum kamedok nadiune halibuguk, uyadi hatihati fafaḡeniḡ kuyoḡ, u indiniḡ mokit adi hogok kahiledok nadiune tuwot mu tuguk.

12

Jesudi talik tububihitnimḡuk u fafaḡe tiḡa kele-dok

¹ Metam nadisukilitihiniḡ koom hatiḡiḡ uyadi mulukwaḡ nabuḡoḡ nihikelemadi tiḡa yaḡiḡiḡ. Adi gebiḡ yakadi tiniḡiḡiḡ doktiḡa nemek nihitubu-malabuda tilak u kwihililiwenekut tiyaneem. En kadakanḡiḡ diniḡ tawadi nihisikondikondiḡelak u maanḡ dobukut tiyaneem. Unduḡ tiḡa talik ninindidimeḡit foloḡ uḡoḡoḡ gweheye mu tiḡa weneḡgeit hogok yawaneem.

2 Unduŋ tiŋa Jesu, nadisukiliti tububihit-nimguk, eŋ nadisukiliti diniŋ foloŋ tubumintalak, adi'walaŋkade didimeniŋoŋ diweyaneem. Adi yadi welenadifo mintamindok yonjit wendok nadiŋa kolonɔdabek foloŋ folofigita nadiguk, eŋ mekaŋoŋ yayatdok wondok nadiune haŋinda tuguk. Unduŋ tiŋa loguk Bepaŋ'walaŋ mapme pop tehindilendileŋnit diniŋ kohoŋ didimeniŋneŋkade itak.

3 Kadakaniŋ titiŋ heki adi nimpekit kisaŋ tigiŋ iŋgoŋ kabupŋiŋ nadikwambundaan yayabuguk. Biyagoŋ kuyoŋ, hidi, Jesu nadisumiŋa mu gweheyleneŋ.

Bepaŋdi nindihitubu-didime tilak

4 Hidi kadakaniŋdi hehitubu-gweheyedok tubune kelekuŋfatdok fafaŋe tiŋa kwanai titabulune naŋgathik nemu kwatneguk.

5 Tiŋa mede niŋ "mihineye" haniŋa hanikwambundaŋit hatak u mu nadiiŋ be? Mede uye indiŋ,

"Mihine, Wapumdi gehitubu-didimeune nadiune fofonŋnit mu tibaak, eŋ ganindidime tubune walage mu gweheyewaak.

6 Wapum adi meeniŋ niŋ tubulodadok nadiŋa tubudidime tilak, eŋ meeniŋ netok yabukahile titiŋdok nadiŋa widihitnadi tiŋa yehitubu-didimelak."

7 Wapumdi hehitubu-didime titiŋdok yobune kedem fafaŋe tiŋa yakaneen. Biyagoŋ kuyoŋ, Bepaŋdi habune ne'walaŋ wapmihiniye tubune unduŋ tihamulak. Be nedi mihibeudi mihiniŋ mu wihitnadiŋa tubudidimelak?

⁸ Widihi tubudidime uyadi wapmihiniye hogo-hogok tiyemulak. Unduŋ doktiŋa hidi unduŋnit mokit hatineen uyadi hidi Bepaŋ'walaŋ wapmihiniye moŋ. Hidi yadi kubo talik gineŋ mintagiŋ hanindok.

⁹ Kwetfoloŋ betniye nihitubu-minta tigiŋdi nindihi tubudidime tubune gikiŋgoŋ tiyemagumun. Undugoŋ doktiŋa munabulinik diniŋ beu yadi gikiŋgoŋ hinek timinene tuwot tibek. Unduŋ tiŋa kulemaŋgoŋ hatiyaneeem.

¹⁰ Adi yadi nadinadihik tuwolit gulet nai muŋgoŋ-kabe nindihitubu-didimegiŋ, eŋ Bepaŋ adi nemek folooŋ hinek mintanimdok unduŋ tinimilak. Biyagoŋ kuyooŋ, ne'walaŋ hatihati uŋgoŋiŋ gineŋ tomboyoutdok unduŋ tinimilak.

¹¹ Indiŋ mintanimilak: nihitubudidime tilak kaŋ timentimeŋ nadinene welenadifonit mu tilak. Adi tobo welebulaningoŋnit tilak, ala mindaŋkade adi tubudidime gineŋ hatiŋa fafaŋeiŋ adi'walaŋkade folooŋ kulema mintalak, wondiniŋ wou hatihati didimeŋiŋ.

Saŋiniŋ moŋgola yali kiulihi titiŋdok

¹² Kaŋ hidi yadi kohohik kumuŋgweheyeŋi eŋ muhik hokiyehi, ale fafaŋeeŋ yalididimeneeŋ.

¹³ Unduŋ tiŋa talik tubudidimeune hautaune hide'walaŋi kayohik sumbandahidi uŋgoŋ takaliŋa wooŋ kedebaneeŋ.

¹⁴ Hidi yadi meeniŋ wanakaŋ hogohogok adut kulema folooŋ hatidok kwanai gicine tiŋa taneen. Tiŋa Bepaŋdi welehik tubuwalandaune uŋgoŋiŋ

hatidok undugon gigne tija fafaneneen. Wele-hik gengehinit hatinen heki adi Wapum tuwot mu kaneen.

¹⁵ Tiyaugene hidi'walaanin ninđi Bepañ'walañ silon tobogon kahiledok fai tibaakneñ ala nadiña kikadoko tiyaneen. Unduñ tija hide'walañ lekingonhik gineñ meeniñ ninđi welen gineñ nadikadaka tija bem niñ kiliki buukaan dabugon mintaan ulihakaan metam fee yehitubukadakaune Bepañ dawi folon gengehinit ti-neeneñ ala.

¹⁶ Tija hidi'walaanin ninđi siloda-me mu tibek, be Iso'walañ talik keleen Bepañ sigilulum timimbek. Tuwo Iso adi beu'walaanin kohonđiki kahiledok hakuk u nadihanindaan nanañe malin nai kubugon nanañdok wendi tuwadok yoguk.

¹⁷ Hidi adi agañ nadimiin, mindan̄kade kahañ mongotdok yobune mon nin̄it. Unduñ tija nemek tuguk u kufulaune dapmandok makat kokekoke mon tuguk, in̄gon tali nemu toom-min̄guk.

Hidi yadi Bepañ'walañ yoli-kwelinen agañ usuwagin

¹⁸ Hidi yadi Isilaehidi Bepañ sañiniñin̄ en̄ kudiñin̄ yabugin̄ fek un̄on̄ mu busuwain̄. Adi Sainai kweboboe tubudulaan̄ kaune kudup wapum daguk en̄ mambip tuguk en̄ sububa wapum sañiniñnit fedikuk,

¹⁹ tija undugon, bai gigilit wapum en̄ mede ham u maan̄ nadigin̄. En̄ nadigin̄ heki adi yadi wabiune koti mu nadidok yon̄a nin̄adiña kobulabulaye tigin̄.

²⁰ Yodoko Mede indin yonit wendok nadiune muntaŋ tuguk. “Meenin be kale ninđi kweboboe yalikaune kawadedi kula ula ulukumundok.”

²¹ Nemek uyadi muntaŋ hinek mintaune Mosesdi maan yoguk, “Nu munta nadinŋa hehele tilat.”

²² Hidi yadi kweboboe undinen moŋ. Hidi yadi Saiyon kweboboe, Bepaŋ hatihati molom, adi’walaŋ yolikweli Jelusalem, kunum gineŋ itak, kaŋ aŋelo fee mumuyenđi bopneŋ tonadifo momoon tiineneŋ unon usuwagin.

²³ Biyagon kuyon, hidi Bepaŋ’walaŋ wapmihinje tuwo heki’walaŋ bophik gineŋ agaŋ usuwagin. Adi yadi Bepaŋdi wohiye agaŋ kunum gineŋ youkuk. Hidi metam hogohogok’walaŋ Bepaŋ mede yodapman tilak, adi’walaŋkade usuwagin, eŋ meenin didimehi yehitubu-walandanđit adi’walaŋ munabulihik dut tomboyoukin.

²⁴ Eŋ Jesu Yofolok Kobuli dinin me lekingonđi nihikiutak adi’walaŋkade usuwagin, eŋ Yofolok Kobuli dinin nanđat’walaŋkade usuwagin. Nanđat wondi Bepaŋ’walaŋ silon tobogon u yofafanelak doktinŋa Abel’walaŋ nanđat kalakapmelak. Abel’walaŋ nanđatdi kibikonđok hogok yofafanegek.

Kougon hatigene Bepaŋdi kwet i mahamulaak

²⁵ Hidi Bepaŋ mede hanilak u magihik suwabun tinŋa sigilulum timineeneŋ ala nadinadinjila hatiyaneneŋ. Koomkwaha kwetfolon fon mute mede yenimbune mede wobu timinŋin adi yadi kibikon yeminjuk. Kaŋ nai indide adi

kunum ginen hatiņa mede ninilak, adi sigilulum timiņa kibikonjit mokit dedij tiņa hatineem?

²⁶ Koomkwaha mede yobune medeņiđdi kwet mahamulune waliwali tuguk. Kaņ yon adi medeņiđ indij hatak. “Nu hatigene kwet mahamula kunum maan mahamulaat.”

²⁷ Kotigon mahamulaat, unduņ yoguk, uyadi nemenemek tubumintaguk uku mahamulune folonamandap niņ mintaneędok nadișuņa yoguk. Folonamandap niņ u mintaan waliwali mu tiņa fafaņeniņ halaak.

²⁸ Kaņ Bepaņ hebeņ foloņ hatihati waliwalinit mokit fafaņeniņ hatak u kahileneem, unduņ doktiņa Bepaņdok welemomooņ nadimiņa niutum-bayaneem. Unduņ tiņa indetok nadinene foune Bepaņ gikiņgoņ timiņa ne nadiune utumbalak wondok tuwolit tipilapilaye timiyaneem.

²⁹ Unduņ tiņa indij nadiyaneem. Bepaņnik adi kudup saņiniņnit undiniņ, wendi nemenemek hogohogok u dadapmalak.

13

Mede yokiliti

¹ Hidi nadisukiliti talik ginen menot tiin uyadi mu wabineę.

² Me nalum buune heyemiņa yapme iitdok gweheye mu tineę. Metam nolidi me nalum heyem yapme ikam yoņa aņelo heyemiņa yapme ikiņ.

³ Tiņa nohiye yot fafaņeniņ ginen yapmenjit aditok nadișuņa nadiune hide wanaņ hapmenjit nabugoņ tibaak. Tiņa hide maan foloohiknit

hatiñ doktiña nohiye widihiyehitubu-figita tinjit aditok maan nadisuneñ.

⁴ Hekimalam hatihatidok nadiune nemek folooñ hinek tubune hekimalam hatihatihik kadokoune Bepañ namanda foloñ walaniñ hinek hatuwaak. Kefifile tiñ, eñ hekimalam kikabi tiñ adi yadi Bepañdi kibikoñ yembaak.

⁵ Eñ welehiñdi muneñ bombonñdok nadigalika kisañ mu tiyaneñ. Nemek hahamuluwaak wendok nadiune tuwot tubune kulemañgoñ moñgo hatiyaneñ. Wapum ne indinñ yoguk, “Nu na yadi mu bihabaat, eñ habukabele mu tibaat.”

⁶ Unduñ doktiña fafañe tiña indinñ yoyaneem, “Wapum adi nu’walañ tubulodane, Nu munta mu tiluwaat. Nediyeñ mañgoñ tinamneñ ale?”

Bepañ’walañ Mede Momoonñ ninindidimenjit u beña Jesu gut hatiyaneem

⁷ Hidi talitimenñhiye Bepañ’walañ mede hanihehitubu-didime tiginñ, aditok hatinadiyemaneeñ, tiña titinñ didimeninñ hati tiña kumuñginñ adi’walañ kayoñ-talik u kañ yehikeleen nadisukilitihinit hatiyaneñ.

⁸ Jesu Kilisto adi yadi hatigukdi hatilak unduñgoñ hatinñ woonñ hatibaak fafañeniñ.

⁹ Hanintubudidime mede mebimebi eñ mede gitipmuhi hanimbune wendi welehiñ mu tubu-filaak. Welehiñ siloñ tobogoñ mededi ulihinñ fafañenñ yalune kedebawaak, eñ nanañe dininñ yodoko mede mebimebidi tuwot mu nihitubulodawaak. Talik u keleginñdi folooñ mu tubu-mintaginñ.

10 Indi'walaŋ alta itak, wondiniŋ nanaŋe Jesu'walaŋ dumuŋ uyadi Judahi'walaŋ titiŋ keleinŋi mu nanaŋdok yeniŋit.

11 Hidi agaŋ nadiin, kale ula dobuŋa naŋgathik Silonyot diniŋ talitimenŋ wapumdi kadakaninŋ tumolodok Silonyot diniŋ Yotmaanŋ Uŋgoninŋ Hinehinek maaneŋ beloune foloonŋ yokwet maginenŋ befoŋ kudupdi heyaginŋ.

12 Kaŋ Jesu adi unduŋon naŋgatŋinŋi meeniŋ welenik tubuwalandadok yokwet diniŋ gimbaŋaŋ maginenŋ naŋila foŋ ulune kumuŋguk.

13 Unduŋ doktiŋa indi maanŋ adi'walaŋkade gimbaŋaŋ maginenŋ foŋ, adi mekaguk unduŋon indi maanŋ tiyaneem.

14 Indiŋ nadiŋa tiyaneem. Inŋon yokwet waaniŋ nemu itnimilak, ala kouŋon hatigene neeŋ mintawaak wendok nadikunakunaleeŋ woom hatiyam.

15 Unduŋ doktiŋa indi Jesu wou folonŋ Bepaŋ youdihiniŋ niutumbanene wondi silonŋdok dumuŋ hemiyam tuluwaak. Biyaŋon kuyon, indi manikdi Bepaŋ nintiloonŋ wou yohautaanŋ yonadifo tiyaneem.

Yokahaŋ eŋ yokiliti mede

16 Silonŋ eŋ kitubuloda kwanai titiŋdok haŋinda mu tiyaneenŋ. Biyaŋon kuyon, Bepaŋ adi wondeŋon nadiune dumuŋ heminŋ foloonŋ tilak.

17 Talitimenŋhiye'walaŋ mede nadiŋa nadiyembune loune mede tilolonŋ tiyemaneenŋ. Adi yadi welehiŋ eŋ munabulihik yabu-ulidoko tiinŋi hatigene kwanaihik tiinŋ diniŋ mebi Bepaŋ namanda

foloŋ yohautaneŋ. Unduŋ doktiŋa kwanai-hik welekedeba foloŋ tubune tuwot tibaak, bulaninŋit tubune hidi mu hehitubu-lodawaak.

¹⁸ Indi adi didimeniŋ hogok hatidok yogigine tiyam doktiŋa hidi inditok Bepaŋ ninadiune Bepaŋ'walaŋ namanda foloŋ kadakaninŋit mokit hatiyaneem.

¹⁹ Tiŋa natok indinŋ hanimbulabulayelat. Bepaŋ ninadiune Wapumdi nehitubudaneune hidi'walaŋkade pilap uuŋdok nadikwambundalat.

²⁰ Dompa kadokome lolonŋit, Wapumnik Jesu adi naŋgatŋinŋ kwatneŋ Yofolok Dapmadapmaŋnit Mokit tubufafaŋeune Bepaŋ Kulema Molomdi kumuŋ gineniŋ tubukaikaŋ tubupilakuk.

²¹ Bepaŋ kwanai u tugukdi nemenemek momohi mebimebi siloŋ tihamuŋa hehitubulodaune mede tiloloŋ timineŋ, tiŋa ne maŋgoŋdok nadiune tuwot tilak uye Jesu Kilisto doktiŋa hidi'walaŋkade tubumintawaak. Adi'walaŋkade wougigit hautanit u niutum-banene haliwoŋ halaak fafaŋeniŋ. U biyagoŋ.

²² Notneye, nu mede kweheyeŋinŋ mu youhamulat. Unduŋ doktiŋa hidi yokiliti mede i nadiŋa nadikadaka mu tineŋdok hanilat.

²³ Tiŋa hanimbe nadineŋ, notnik Timoti adi yot fafaŋeniŋ gineniŋ agaŋ fiyakukiŋ, ala pilap buune nagila wooŋ habudemmeet.

²⁴ Talitimenhiye eŋ meeniŋ nadisukilitihinit hogohogok wanaŋ haniutumbadapmalat. Italihi nadisukiliti metam adi maŋ haniutumbainŋ.

²⁵ Silon tobogonɗi hidi'walaɗkade hahamu-
luwaak.

**Bepan'Walaŋ Folofolok Kobuli
Genesis, Exodus, Psalms, and the New Testament in
the Numanggang Language of Papua New Guinea
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanŋaŋ (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 18 Apr 2025 from source files dated 31 Aug 2023

217908e9-ce08-5ac3-9947-124c48579a74